

Ishaaq^(a.s) Kī Paidaish

Taurait : Khilqat 17:15-26; 21:2, 4, 6, 8

[Ibraaheem^(a.s) kī beewī, Saarah, ab tak Saraayī kahalaatī theen. To] Allaah taa'alā ne Ibraaheem^(a.s) se kahā, "Maiñ tumhaarī beewī Saraayī ko bhī ek nayā naam duṅgā. Uskā nayā naam Saarah hogā,⁽¹⁵⁾ maiñ usko barkat duṅgā aur usse tumheñ ek aulaad haasil hogī." Wo bahut logoñ kī maañ hogī aur bahut sī saltanaton ke baadshaah usī se paidā hoṅge."⁽¹⁶⁾ Allaah taa'alā kā shukr adā karne ke liye Ibraaheem^(a.s) ne apnā sar neeche zameen par jhukaayā. Ibraaheem^(a.s) hañse aur apne āp se kahā, "Kyā ek ādmī jo sau saal kā hai aur Saraayī jo nabbe saal kī hai, ek bacche ko paidā kar sakte haiñ?" To⁽¹⁷⁾ Ibraaheem^(a.s) ne Allaah taa'alā se kahā, "Ismaaeel par bhī to āpkī nazre karam hogī."⁽¹⁸⁾ Allaah taa'alā ne kahā, "Yaqeenan tumhaarī beewī Saarah se ek beṭā paidā hogā jiskā naam Ishaaq hogā. Maiñ us se ek ahad karuṅgā jo hameshā ke liye rahegā, har ek ke liye jo uske baad āeṅge."⁽¹⁹⁾ Aur jo tum Ismaaeel ke baare me kah rahe ho maine usko bhī sun liyā hai. Maiñ usko bhī barkat duṅgā aur uskī bhī bahut saarī aulaadeñ hoṅgī. Maiñ usko azeem banā duṅgā. Wo baarah shahazaadoñ kā baap hogā aur maiñ uske ḡhaandaan ko ek azeem qaum banā duṅgā."⁽²⁰⁾ Merā ahad Ishaaq se purā hogā. Tumhaarī beewī agle saal isī mausam me ek laḍke ko paidā karegī."⁽²¹⁾ Jab Allaah taa'alā kī Ibraaheem^(a.s) se baat purī huī to bashaarat ḡhatm huī.⁽²²⁾

Ibraaheem^(a.s) ne Allaah taa'alā ke hukm ke mutaabiq apne beṭe Ismaaeel^(a.s) kā, saare laḍkoñ kā jo unke ghar maiñ paidā hue the, aur wo saare naukar jinko unhone paison se ḡhareedā thā, sabkī ḡhatnā karaayī. Jab⁽²³⁾ Ibraaheem^(a.s) kī ḡhatnā huī to unkī umr ninnaanabe saal kī thī,⁽²⁴⁾ aur unke beṭe kī umr terah saal kī thī.⁽²⁵⁾ Ibraaheem^(a.s) aur unke beṭe kī ḡhatnā ek hī din huī thī.⁽²⁶⁾

21:2,4,6,8

Sarah buḍhaape me haamilā huī aur unhone Ibraaheem^(a.s) ke liye ek laḍke ko paidā kiyā. Wo us waqt hī haamilā huī jo waqt Allaah taa'alā ne unke liye tay kiyā thā.⁽²⁾ Allaah taa'alā ke hukm ke mutaabik Ibraaheem^(a.s) ne apne beṭe Ishaaq^(a.s) kī ḡhatnā kī jab wo āṭh din ke the.⁽⁴⁾ Sarah ne kahā, "Allaah taa'alā ne mujhe hañsā diyā aur jo koī bhī is baat ko sunegā wo bhī hañsegā."⁽⁶⁾ Bacchā baḍā huā aur uskā ḡhudh ḡṭaayā gayā aur usī din Ibraaheem^(a.s) ne ek bahut shaandaar daawat dī.⁽⁸⁾